

Gregorian: Pasivnost u pogledu ratnih zločina je neprihvatljiva



Prvi zamjenik visokog predstavnika, Raffi Gregorian, tokom svoje današnje posjete Srebrenici kritikovao je pasivnost te nepostizanje rezultata na strani odgovornih vlasti BiH i posebno vlasti Republike Srpske u pogledu njihovih «nastojanja» da osumnjičene za ratne zločine izvedu pred lice pravde.

«Neprihvatljivo je da se žrtve još uvijek mogu susresti sa počiniocima u svom svakodnevnom životu,» izjavio je dr. Gregorian nakon sastanka sa komandirom Policijske stanice u Srebrenici, Željkom Vidovićem.

Prvi zamjenik visokog predstavnika je ponovio da je Upravni odbor Vijeća za implementaciju mira na svom sastanku održanom u februaru dao smjernice Uredu visokog predstavnika (OHR) da saradnju sa Međunarodnim krivičnim tribunalom u Hagu postavi kao prioritet, ističući da je OHR već pojačao svoj angažman kako bi osigurao da se počinioci izvedu pred lice pravde.

Današnja posjeta predstavlja dio obuhvatnije provjere aktivnosti vlasti kako bi se osiguralo da se oni koji su osumnjičeni da su počinili ratne zločine suoče sa licem pravde. Ranije tokom ove sedmice, prvi zamjenik visokog predstavnika se susreo sa predstavnicima udruženja preživjelih Srebreničana, ministrom sigurnosti BiH Tarikom Sadovićem, i komandantom glavnog štaba NATO-a u Sarajevu, general majorom Richardom Wightmanom. Prošle sedmice, prvi zamjenik visokog predstavnika posjetio je Graničnu policiju BiH i policiju RS locirane u Zvorniku kako bi ustanovio da li su se poboljšali napori usmjereni na razbijanje mreža onih koji pružaju pomoć

osobama optuženim za ratne zločine od 2004.god. kada je visoki predstavnik smijenio policijske službenike.

«Neopstruiranje Haškog tribunala nije dovoljno. Prije dvije godine Komisija RS za Srebrenicu je sastavila spisak onih lica koja su bila raspoređena u jedinice koje su učestvovalе u operacijama egzekucija u julu 1995.god. Vlasti BiH i RS veoma dobro znaju da postoje lica koja su učestvovala u genocidu u Srebrenici koja još uvijek rade u policiji i na drugim pozicijama u organima vlasti BiH i RS. Vlasti moraju proaktivno djelovati, te osigurati da istražitelji imaju sredstva koja su im potrebna da urade ovaj posao» rekao je dr. Gregorian.

«Sve dok policija RS ne počne voditi istragu vezanu za vlastite operativce, tvrdnje da su se institucije RS reformirale neće prolaziti,» dodao je dr. Gregorian. «Štaviše, iste naglašavaju hitnu potrebu za provođenjem reforme u policiji.»

Tokom svoje posjete, dr. Gregorian se također susreo sa načelnicima Srebrenice i Bratunca – Abdurahmanom Malkićem odnosno Nedeljkom Mlađenovićem – predsjednikom Opštine Srebrenica Radomirom Pavlovićem, bivšim predsjedavajućim Skupštine opštine Bratunac Refikom Begićem i predsjednikom mjesne zajednice Glogova Senadom Avdićem.